

DATE: 14/01/2008

# 'Malaysia negara Islam berjaya'

um - 14/1/2008

Daripada ZAHARUDDIN MD ALI

**MADRID** 13 Jan. - Kerajaan Sepanyol menganggap Malaysia adalah sebuah negara Islam berjaya, dihuni oleh masyarakat pelbagai kaum dengan mengamalkan kaedah pemerintahan demokrasi yang harus dicontohi oleh negara-negara lain di dunia.

Di atas kejayaan Malaysia itu, Perdana Menteri, Datuk Seri Abdullah Ahmad Badawi telah dijemput untuk berkongsi dan bertukar-tukar pandangan mengenai bagaimana untuk mengurangkan jurang kesalahan fahaman antara kaum dan agama serta dalam konteks yang lebih luas lagi antara dunia Islam dan Barat pada Forum Tahunan Pertama Perikatan Ketamadunan di ibu kota Sepanyol di sini Selasa ini.

Duta Malaysia ke Sepanyol, Datuk Naimun Ashakli Mohammad berkata, penganjur forum berharap Perdana Menteri boleh memberikan pandangan dan berkongsi pengalaman Malaysia yang banyak mencatat kejayaan dan dicemburui oleh banyak negara di dunia.

Pada forum itu, katanya, Abdullah yang dijemput sebagai salah seorang ahli panel, akan diberi peluang untuk menyampaikan ucapan dan disusuli dengan sesi perbincangan.

Bercakap dalam sidang akhbar di sini hari ini, katanya, seramai 10 ketua negara dan bekas-bekas perdana menteri serta lebih 50 orang menteri luar dijadual menghadiri forum yang dianjurkan oleh kerajaan Sepanyol itu.

Antara lain, katanya, ia bertujuan mencari jalan bagaimana untuk merapatkan jurang antara negara dan budaya di seluruh dunia dalam usaha menggalakkan persefahaman sejagat.

Forum dua hari itu, jelas beliau, akan dirasmikan oleh Presiden Sepanyol, Jose Luis Rodriguez Zapatero. Turut hadir ialah Perdana Menteri Turki, Recep Tayyip Erdogan, Setiausaha Agung Pertubuhan Bangsa-Bangsa Bersatu, (PBB), Ban Ki-moon selain bekas Presiden Portugal, Jorge Sampaio yang dilantik sebagai perwakilan tertinggi forum itu.

Forum itu diwujudkan atas inisiatif kerajaan Sepanyol dan Turki pada 2005 di bawah naungan PBB dan ia disokong oleh 'Group of Friends' yang dianggotai oleh masyarakat 75 buah negara serta badan dan pertubuhan antarabangsa.

Naimun Ashakli menambah, selain forum, Perdana Menteri juga akan mengadakan perbincangan dua hala dengan Zapatero pada sebelah tengah hari di pusat konvensyen tempat forum itu dilangsungkan Selasa ini sempena lawatannya yang pertama ke Sepanyol.

Pada pertemuan itu, katanya, Abdullah akan mengambil kesempatan untuk menyampaikan jemputan kepada Zapatero untuk menghadiri Persidangan Antarabangsa Dunia Islam Ketiga - Merapatkan Jurang yang akan diadakan pada Jun depan.

Dalam pertemuan yang dijangka berlangsung selama satu jam itu, kedua-dua pemimpin juga akan berbincang mengenai situasi di Myanmar dan Semenanjung Korea selain bertukar-tukar pandangan mengenai perkembangan semasa di Asia Barat.

Mengenai hubungan Malaysia-Sepanyol, Duta Malaysia itu berkata, umumnya ia adalah baik dengan jumlah dagangan mencecah RM3.59 bilion antara Januari hingga Oktober 2007.

Dalam tempoh yang sama, katanya, Malaysia mencatatkan lebih dagangan berjumlah RM1.27 bilion di mana eksport utama ke Sepanyol ialah peralatan telekomunikasi, peralatan elektrik, peralatan jentera, lelemak sayuran, tekstil dan sarung tangan getah.

Pada masa yang sama, Malaysia pula mengimport peralatan besi dan keluli, bahan-bahan kimia, bahagian-bahagian jentera serta peralatan elektrik dari negara ini.


Naimun Ashakli menambah, walaupun keadaan adalah baik, hubungan dua hala yang ada boleh dipertingkatkan lagi khususnya membabitkan bidang perdagangan, pendidikan dan pelancongan.

Katanya, ini boleh dilakukan dengan meningkatkan jumlah lawatan para pegawai kanan kerajaan di kedua-dua negara.

Pada masa yang sama, beliau menyarankan Malaysia Airlines System (MAS) supaya mengadakan semula perkhidmatan ke Madrid bagi mengambil kesempatan daripada pasaran pelancongan yang besar di negara ini.

Melalui penerbangan itu, katanya, beliau percaya jurang antara kedua-dua negara boleh dirapatkan selain Kementerian Pelancongan meningkatkan lagi aktiviti untuk menarik lebih ramai pelancong ke Malaysia.

- Utusan



SAMBUT... Abdullah Ahmad Badawi diiringi Setiausaha Rendah Kementerian Luar Sepanyol (Ketua Asia Pasifik), Duta Salarich (kiri) dan Duta Malaysia ke Sepanyol, Naimun Ashakli Mohammad setibanya di Lapangan Terbang Tentera Torrejon di Madrid, semalam.

- Gambar Bernama